

ALAHADY FAHA 31 MANDAVANTAONA - A



TOETRA MAHITSY SY MANETRY TENA NO ILAINA HANOMPOANA NY FIANGONANA

Ry Kristianina havana, miroso hatrany tokoa isika hivelona ny teny fanevan'izao taonan'ny fandalinam-pinoana izao dia ny hahatonga antsika ho Kristy mpiara-belona amin'olona ka zary fanasina sy fahazavana fa indrindra amin'izao vanim-potoana iainantsika izao izay mitaky tokoa ho vavolombelona fa tsy mpitoriteny. Raha mihaino mpitoriteny isika dia mivelona ny

teny torin'ireo mpitoriteny. Manana ohatra velona isika amin'izany dia i Kristy, manana ny toetra maha Andriamanitra azy izy kanefa nataony tsinontsinona, nietry tena izy ary naneho izany tamy mpiara-belona.

Ny foto-kevitra tian'ny Eglizy ho raisintsika amin'izao Alahady faha 31 mandavantaona izao dia tsy inona fa

toetra mibaribary ao amin'i Kristy dia toetra feno fahamarinana sy mahitsy fo ary feno fanetren-tena ka ilaina tokoa raha te ho mpanompo tahaka an'i Kristy isika.

I Kristy no modely fototra sy lasitra ho antsika, izany no mahatonga antsika ho Kristy mpiara-belona. Nivelona an'izany koa i Masina Maria ka modely ho antsika koa, feno fanetren-tena izy, ohatra tsara tadidintsika ny nataony raha nanompo ny rahavaviny Elizabeta izy nandritra

Vakiteny I : Mt. 1, 14b – 2, 2b. 8-10

Tononkira : Salamo 130

Vakiteny II : 1 Tes. 2, 7b-9. 13

Evanjely : Mt. 23, 1-12

ny enim-bolana. Toy izany koa i Md Josefa, lehilahy marina, mpandrafitra no anarany ary nanompo ny fianakaaviana masina izy, raim-pianakaviana azo itokisana izy.

Manana ohatra velona koa isika ary malagasy iray rà amintsika niaina izany fanompoana sy fanetren-tena izany : i Victoire rAsoamanarivo, i Lucien Botovasoa martiry noho izy feno fanetren-tena ary nanompo tokoa, Rabefihavanana no niantsoana azy.

Io toetra mahitsy sy manetry tena io no ilaina hanompoana ny Eglizy. Izay no mahatonga antsika ho Kristy mpiara-belona amin'olona.

Izany no hafatra lehibe androany Alahady faha 31 mandavantaona ary ambaran'ireo vakiteny telo amintsika.

Ny vakiteny voalohany bokin'i Malakia mpaminany milaza mivantana ho an'ireo tompon'andraikitra hanasoa ny hafa fa ilaina izany toetra feno fahamarinana sy mahitsy izany. Manome tsiny aza izy hoe : *"Raha tsy henoinareo sy tsy rototra ianareo ny hanome voninahitra ny Anarako, hoy ny Tompon'ny tafika, dia handefa ozona hamely anareo Aho"*

Anatra ho antsika izany ry Kristianina havana, aoka tsy hihatsara velatsihy isika eo amin'ny fiainantsika. Tsy mety raha hafa ny lazaintsika, hafa ny ataontsika, manamboamboatra ny zavatra atao. Aoka isika haneho amin'ny fiainantsika ny maha-Kristianina antsika. Aoka isika hahay hampitraotra ny finoana sy ny fiainana andavanandro. Ny teny manaitra fa ny atao no mahasarika ary izay no mahatonga antsika ho Kristy mpiara-belona amin'olona araky ny ataontsika.

Ilaina ny teny fa tsy izany ny tanjona fa ny ataontsika raha tiantsika ny hivelona ny hoe Kristy mpiara-belona amin'olona. Izany ny nahatonga i Jesoa nananatra an'ireo mpihaino azy raha nahita ny nataon'ireo mpanora-dàlana sy farisianina ka hoy izy tamin'ireo manodidina azy teo hoe *"Efa mipetraka eo amin'ny toeran'i Môizy ny mpanora-dalàna sy ny Farisianina; ka ataovy sy araho izay rehetra lazainy aminareo, fa aza maka tahaka ny ataony, satria milaza fotsiny izy fa tsy manao."*

Ry Kristianina havana, aza milaza fotsiny isika eo am-pivelomana ny maha-Kristianina izany fa aoka isika hanao, ho tanterahintsika izay rehetra tenenintsika. Io no mahatonga ilay tenintsika hoe mivavaka Alahady fa manao an'izao rehefa Alatsinainy. Aoka hifanaraka amin'ny fivavahantsika sy maha-Kristianina antsika ny fiainantsika, hifanaraka amin'ny teny avoakantsika ny ataontsika. Io no mahatonga an'i Jesoa niteny ireo farisianina satria tsy mifanaraka amin'ny teniny ny ataony ka manome enta-mavesatra ho an'ny olona *"Fehezin'izy ireo ny zava-mavesatra sarotra entina, dia atainginy eo antsoroky ny olona, nefa izy tsy mety hanetsika izany na dia amin'ny rantsan-tanany akory aza"*

Marina ny tenin'Andriamanitra dia natao ho an'ny olona rehetra, nefa raha miresaka an'izany isika dia tonga an-tsaina izahay tompon'andraikitra na ara-pinoana, na ara-drazana na eo amin'ny firenena. Ny ohatra dia tsy maintsy miainga avy aminay, ary izahay tompon'Andraikitra tsy mety manatanteraka izay lazainay.

Matoa mikoroso fahana ny fiaraha-monina, ny fiainam-pianakaviana, ny fianana amin'ny Eglizy, izahay no mahatonga an'izany ka mila fibebahana ary izay no lazain'i Jesoa androany amin'ny Evanjely nosoratan'i Matio (*Mt. 23, 1-12*), marina amin'olona izy no miteny fa nanao antso avo tamin'ireo farisianina sy mpanora-dàlana.

Aoka hivavaka mandrakariva isika araky ny hafatra Md Paoly tamin'i Timote : ~~hivavaka ho an'ny mpitondra mba tsy hampitondra entana izy fa hitondra entana. Milaza koa i Jesoa fa izay lehibe indrindra aminareo no ho mpanomponareo, mitaky toetra feno fahamarinana sy mahitsy sy toetra feno fanetren-tena ary ao anatin'izany no hahafahana manompo tokoa.~~

Hivavaka ho an'ny mpitondra rehetra isika mba tsy hampitondra ny enta-mavesatra ho an'ny vahoaka entiny fa hanasoa sy hanatsara ary hikatsaka izay hahasoa ireo entina fa tsy hampitondra entana an'ireo entina, ho mpanompo tokoa ary ao anatin'ny fanetren-tena. Tahaka ny voalazan'i Jesoa hoe *"Izay lehibe indrindra aminareo dia ho mpanomponareo; fa izay hanandra-tena dia haetry ary izay hanetry tena dia hasandratra"*.

Tsy ny voninahitra, tsy fisehosehoana izany no tadiavaina, tsy hipoerapoera no ilaina fa olona hanatanteraka ny sitrak'Andriamanitra ary isika hifanasoa sy hikatsaka mandrakariva ny fifankatiavana ary ny fampihavanana no sitrany.

Ambaran'i Jesoa antsika ny làlan-kombana, tsy anatin'ny fanandratan-tena fa anatin'ny fanetren-tena sy fahamarinana hahatonga antsika ho mpanompo.

Md Paoly ao amin'ny vakiteny faharoa milaza tsy mihambahamba " *Tsy ny Evanjelin'Andriamanitra ihany no nirinay homena anareo, fa ny ainay koa aza, satria efa tonga maminay loatra ianareo.* " Izany hoe tsy ny vaovao mahafaly ihany no tonga aminareo fa i Kristy mpiara-belona. Izany koa no tsy maintsy iainantsika amin'izao andro izay mila vavolombelona izao sy fanehoana amin'ny fiainana manontolo ny maha zanak'Andriamanitra antsika izany.

Io voalazan'i Md Paoly io ihany koa dia niainan'i Lucien Botovasoa ka namoizany ny ainy. Enga anie isika koa ho tena mpiara-dia amin'i Jesoa tahaka azy.

Ry Jesoa Tomponay ô, esory ato aminay ny toetra mieboebo sy mihatsara velatsihy, enga anie izahay halemy fanahy sy hanetry tena tahaka anao araky ny vavaka ataonay amin'ny fanokanan-tena amin'ny Fonao masina, enga anie hanahaka ny fonao tokoa izahay ka ho mpikatroka mafana fo amin'ny fanitarana ny fanjakanao ka ho tonga Kristy mpiara-belona amin'olona tokoa izahay. Amen

Mompera Arserveka Mgr Benjamin Ramaroson